

NOS hendenan SPECIAL

Maruja Forero:

UN ARTISTA INNATO CU TA FORMANDO HOPI HOBEN ARUBANO ARTISTICAMENTE

Redacta pa : Mercedes Abdul

DIARIO tin como invitado awe den su espacio "Nos Hendenan Special" Sra. Maruja Forero-Manrique, kende a nace na Colombia pero tin 17 aña largo ta biba na Aruba unda e ta hopi activo den e ramo cultural, y "pensando en los demas" manera e mes ta bisa, e sa di hiba entretenimento y alegria cu su gruponan artistico na casnan di anciano, hospital, prison, etc. Ademas e ta formando hopi mucha riba tereno di arte dramático, danza, canto, instrumentonan musical, etc. E tin hopi amor pa Aruba y pesey el a opta pa su naturalizacion. E ta preocupa si, pa nos hubentud cu lo mester carga Aruba mañan.

Maruja Forero a pasa su educacion basico na School Alice Blok na Bogota y school secundario na e Liceo Nacional Femenino. Desde chiquito Maruja Forero a siña arte tanto danza como canto, declamacion, teatro y musica. "Fuera di e lesnan reglamentario mi tabata ricibi les di danza clasico cu e maestro ruso Kiril Pikieris, y danza Spaño cu e maestro Pablo Rivas. Desde mi 8 aña di edad te cu mi 14 mi a ricibi les di teatro cu e maestro Luis Enrique Osorio, dramaturgo y escritor famoso di Bogota.

Ademas mi a participa den diferente tayer di teatro cu otro profesornan destaca e.o, prof. Seki Sano, Victor Mallarino, y Bernardo Romero Lozano".

Cu su 15 aña di edad Maruja Forero a obtene su diploma como "Mecanotaquigrafa Corresponsal", pero nunca a traha como secretaria. Maruja a worde capacita den e rama di Educacion Estetica den e campo di canto, declamacion, actuacion, danza, folclore, instrumentonan di cuerda y percusion, etc.

"Como declamador profesional mi a haci varios

recital na Teatro Colon, Centro Colombo Americano, Alianza Colombo Frances, algun museo y colegionan unda mi tabata worde solicitada".

NA ARUBA

E prome grupo cu Maruja Forero a forma na Aruba a nace na aña 1983.

"Mi a lanta e grupo di canto y musica "Aruba-83" na Instituto di Cultura. Nos tabata 32 persona entre Adulto, hoben y mucha. Cu nan nos a cubri un agenda pa prome biaha den e mesun Instituto, den Casnan di Anciano, Hospital y Prison.

GRUPO AMANECER

Na 1984 a nace "Aruba 84" cu cual a cubri e mesun agenda social, pero e grupo aki no a sigui. Mi a bay traha cu e presonan den prison y mi a logra di funda "Grupo Amanecer" cu e presonan despues di hopi trabao. Akinan nos a haci teatro, declamacion, etc.

Akinan mi a keda 8 aña consecutivo. E evento mas grandi cu nos a organiza tabata e "Show di Navidad" cu tabata worde presenta cada aña. Pero despues KIA a muda hopi leu, y pa motibo di transporte tur cos a complica pa mi".

TERTULIA LITERARIA "ARUBA NUEVA"

Na aña 1987 Maruja Forero a funda Tertulia Literaria "Aruba Nueva" despues di un curso di Declamacion y Oratoria, cu el duna na Cas di Cultura.

"Tradicionalmente nos ta celebra un recital cada aña pa e luna di November. E evento aki ta totalmente cultural sin fines di lucro, na cual tur amante di poesia ta invita como publico y como

participante".

LA ESCALA

Dia 25 di October di 1988 a nace "LA ESCALA".

"Esaki ta un coro folclorico unda nos ta traha cu hopi gana, pasobra e ta constitui pa su integrantenan un "valvula de escape", un alimento pa nan spirito, un recreacion sano, y un aprendizaje constructivo cu despues, na luna di December tin e satisfaccion di comparti su alegria cu e enfermonan di hospital, e grandinan di e diferente cas di anciano, y algun presentacion di tipo cultural".

TALENTO INFANTIL

"Talento Infantil a nace na aña 1991, como medio di trabao dentro di mi ramo ora mi tabata tin vergunning pa traha.

Talento Infantil ta pa siña muchanan educacion estetica cu ta algo asina bunita, haciendo enfasis den disciplina y urbanidad. Esey kiernen cu e muchanan ademas di siña ta haya formacion.

Anualmente ta worde realiza un show den Cas di Cultura, unda e alumnonan por demonstra no solamente dilanti su famia pero su invitadonan loke nan a siña, ademas di comparti un anochi di arte y di cultura cu e publico cu ta honra nos cu su presencia".

NOTAS LITERARIAS

Maruja Forero a cuminsa publica su columna "Notas Literarias" den **DIARIO** na 1983.

"Loke mi ta trata cu mi columna "Notas Literarias" ta pa hiba un mensahe positivo unda cu e lector por recrea su mes, pero tambe haya un mensahe como un inquietud chiquito pa reflexiona y pa e



Sra. Maruja Forero

practica su Spaño.

E columna aki ta dunami hopi satisfaccion ya cu e diferente comentarionan cu mi ta haya ta hopi positivo".

TEATRO

Maruja Forero tambe a lanta un grupo di teatro. Esaki tabata e Grupo Tenaz.

"Grupo Tenaz a worde funda na aña 1986. E aña ey nos a monta un obra cu a worde presenta den e Festival di Teatro.

Despues di e festival e grupo a worde desintegra, pero e aña siguiente nos a monta un otro obra cu algun di e integrantenan antiguo y e mayoria nobo. Lamentablemente nos a confronta un tragedia pa motibo di fayecimento di Maritza Duarte y nos mester a suspende tur e actividad.

Na 1994, cu tur hende nobo (mucha y adulto) nos a monta "Esequiel el Pastor y el Milagro de Navidad", cual libreto ta di mi propiedad".

E idea y deseo di haci teatro tey, segun Maruja Forero ta indica, pero loke ta haci falta ta interes y voluntad door di e personanan cu ta gusta haci

teatro.

ARUBA AWE

Maruja Forero a worde naturaliza como Hulandes algun aña pasa. E tin hopi cariño pa Aruba y e ta kere cu bin Aruba ta parti di e Plan cu Dios tabata tin pe.

"Mi ta nota un cambio basta drastico durante e ultimo añanan aki na Aruba. Ta duelmi cu no ta un cambio positivo, pero mas bien negativo. Pesey nos mester lucha pa yuda nos hubentud, cu manera nos tur sa, ta e futuro di e Pais, como ademas mester sa cu cultura ta lo mas grandi di un pais. Mi ta kere cu e cambionan mester bay di tal manera cu nos hubentud keda na prome lugar. No mester spaar esfuerzonan encuan to educacion pa nos muchanan pasobra den un futuro nan lo bira esnan responsable di e organizacion di nos Pais".

Maruja Forero ta indica cu e ta spera cu tur su esfuerzonan lo worde bon interpreta den e comunidad di Aruba pasobra su trabao e ta haci cu hopi amor, "pensando en los demas".